

Kalaallit Nunaanni eqqartuussisarnermik inatsisip aamma Kalaallit Nunaanni pinerluttulerinermi inatsisip allanngortinneqarneri pillugit inatsit (Kalaallit Nunaanni eqqartuussisarnermik inatsimmi malittarisassat il.il. nutarterneqarnerat) pillugu siunnersuummut missingiutip Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut
(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoq)

Saqqummiussissut

(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoq)

Siullermeerneqarnera

Inatsisit atuutsinneqarnerannut suliassa qarfiup sunniuteqarluartuunissaanik aamma ullutsinnut naleqquttuunissaanik, aamma taamaalilluni innuttaasut kissaataannut inatsisitigullu naapertuuttoqarneranik misigisimasaannut sapinngisamik pitsaanerpaamik naapertuuttuunissaanik Naalakkersuisut ataavartumik kissaateqarnerat tunngavigalugu inatsisissatut siunnersuut manna saqqummiunneqarpoq.

Siunnersuutit amerlanersaat eqqartuussisarnermik inatsisitsinnut nutarterinerupput, taakkulu eqqartuussivinnut isumaqatigiissummit, aamma Kalaallit Nunaanni eqqartuussivinnut, ukiunut arlalinnut 2023-imi isumit isumaqatigiissutigineqartumit aallaaveqarput. Kalaallit Nunaanni eqqartuussivinni isumalluutit atorneqarsinnaalernissaannut aamma sulianik suliarinnittarnermut piffissap atorneqartartup appartinneqarnissaannut allannguutit peqataanissaat siunertarineqarpoq.

Tamatuma saniatigut Eqqartuussiveqarfimmi sullissisut suliatic pillugit ilinniarsimanerulernissaat pillugit Suleqatigiissitaannit, Kalaallit Nunaanni Eqqartuussiveqarneq pillugu Siunnersuisoqatigiit ataanni pilersinneqartumit, innersuussummik ataatsimik siunnersuut imaqarpoq. Siunnersuut taanna pinerluttulerinerni ilungersunartuni tamani eqqartuussissuserisumik imaluunniit illersuisumik akuerisaasumik inatsisilerinermut tunngassuteqartumik kandidatitut ilinniarsimasumik ivertitsisoqarnissaanut tunngassuteqarpoq.

Allannguutissatut siunnersuutit amerlasuut akornanni marluk erseqqissassavakka:

Qaqugukkut eqqartuussisooqataasut pinerluttulerinermik suliani peqataasarnissaannut killiliussap qaffatsinneqarnissaa siullertut siunnersuutigineqarpoq.

Suliani, sivilunerpaamik ulluni 30-ini inissiisarfimmi inissiinissaq eqqartuussutigineqarsinnaatillugu, najukkani eqqartuussivinni eqqartuussisut,

eqqartuussisooqataasut peqataatinngit suliamik aalajangiisinnaanissaat, siunnersuutip kinguneraa. Najukkani eqqartuussivinni sulianik suliarinnittarnermut piffissat atorineqartartut annertuumik appartinneqarnissaannut taamaaliorneq peqataasinnaavoq. Pingaarnertut isumaqatigiinniarnertup nalaani, tassani eqqartuussisoq ataaseq taamaallaat apeqqutinik paasinarsisitsisunik apeqquteqarsinnaalluni, aamma taasinerup nalaani, tassani inuit isummaminnik avitseqatigiittussat pingasuusussaanatik, suliap eqqartuussisunik pingasunik eqqartuussisoqarani ataasiinnarmilli eqqartuussisoqarluni sukkannerusumik aalajangiiffiqeqarsinnaanerani, suliamik suliarinninnermi piffissami atorineqartartumi sipaarutaasut nassaarineqassapput. Eqqartuussisooqataasut takkutinngitsoortillugit suliat kinguartinneqarnerat pisinnaammat, taamaattoqarneratalu aamma suliamik suliarinninnermut piffissat atorineqartartut sivitsorsinnaammagit, tassunga aamma ilaavoq.

Siunnersuut alla unnerluussutip taamaatiinnarneqarnerata aamma unnerluussummik tunuartsinerup allanngortinneqarnissaanut piffissaliussap qaammatinit 3-nit qaammatinut 4-nut sivitsorneqarneranut tunngassuteqarpoq. Suliap naammassineqarnera aamma taamaalilluni eqqartuussivimmut saqqummiunneqannginnera pissutigalugu, eqqugaasumit naammagittaalliutip suliarineqarnissaanut oqartussaasut sivilunerusumik piffissaqalernissaat, tamatuma kinguneraa.

Danmarkimi suliami aalajangersimasumi, ilaatigut podcast-ilimi “Kukkuneq ajuusaarnartoq”-imi eqqartorneqartumi, suliap uppersarsarneqarsinnaannginnera pissutigalugu politiini unnerluussisussaataasut pinngitsaaliilluni atoqateqarsimaneq pillugu suliaq naammassivaat, taamaalillunilu nalunaarutiginnittoq aalajangiineq pillugu naammagittaalliuteqarnissamik periarfissinneqarani. Kukkunerit assigiinngitsut pissutigalugit pingaarnertut unnerluussisussaataasut aalajangiinerup allanngortinneqarnissaa angumerinngilaat, taamaalilluni piffissaliussap atuuttup iluani suliaq eqqartuussivimmut saqqummiunneqanngitsoorluni, aamma suliap eqqartuussivimmi suliarineqannginnissaa pillugu aalajangiinerup attatiinnarneqarnera, tamatuma kinguneraa. Suliaq Europami Inuit Pisinnaatitaaffii pillugit Eqqartuussivimmut saqqummiunneqartoq, taassumalu eqqugaasup inuttut pisinnaatitaaffii innarlerneqarsimasut inerniliuppa.

Piffissaliussap sivitsorneqarnerata kukkunerit taamaattut pinngitsoortinneqarnissaat periarfissinniartussaassavaa.

Taamatut oqaaseqarlutik Naalakkersuisut immikkoortoq Inatsisartuni suliarineqartussanngortippaat.